

HAYATI KONSEP MALAYSIA MADANI

● Untuk membangunkan masyarakat holistik, merentasi sempadan agama dan bangsa

UB 12.12.2023 P.01

KOTA KINABALU:

Setiap keluarga tanpa mengira etnik, agama dan budaya perlu terlibat dalam memberi sumbangan kepada pembangunan masyarakat yang holistik melalui konsep Malaysia Madani, kata Yang Dipertua Negeri Sabah Tun Juhar Mahiruddin.

Sehubungan itu, beliau yang juga Canselor Universiti Malaysia Sabah (UMS) berkata, seluruh rakyat perlu menjiwai konsep Malaysia Madani cetusan idea Perdana Menteri Datuk Seri Anwar Ibrahim yang bersifat universal, merentasi sempadan agama dan bangsa.

Beliau berkata, Malaysia Madani juga wajar dijadikan sebagai prinsip utama dalam melaksanakan agenda pembangunan masyarakat dan pembinaan negara.

“Tunjang kepada masyarakat Madani adalah perpaduan melalui integrasi sosial yang didasarkan pada suatu ikutan hidup, dan menghindarkan

diri dari konflik yang mampu menyebabkan perpecahan. Realitinya, konsep ‘Keluarga Madani’ amat dekat dengan suasana kehidupan kita di Sabah.

“Walaupun Sabah mempunyai lebih 32 etnik, kita sudah sehati dengan nilai kekeluargaan majmuk, harmoni, keterbukaan dan kebersamaan. Ini menjadikan Sabah negeri contoh mewujudkan perpaduan dan keharmonian dalam masyarakat di Malaysia,” katanya ketika berucap merasmikan Majlis Konvokesyen UMS ke-25 di Dewan Canselor UMS di sini, semalam.

Juhar juga meminta agar dengan semangat keluarga Madani, semua pihak bersama-sama berganding bahu menghindarkan diri daripada konflik untuk mengekalkan perpaduan, kestabilan, keamanan dan keharmonian hidup yang telah dikecapi sejak turun-temurun.

“Semangat ini jugalah yang perlu kita bawa untuk mewujudkan kesatuan dan kebersamaan seluruh rakyat



TAHNIAH: Tun Juhar menyampaikan Ijazah Doktor Falsafah Kejuruteraan kepada salah seorang graduan UMS sempena Majlis Konvokesyen UMS ke-25 di Dewan Canselor UMS semalam. — Gambar Bernama

jelata. Semoga kemakmuran dan kesejahteraan di negara kita dapat dikekalkan buat selama-lamanya,” tambahnya.

Sementara itu, Juhar yakin, semua graduan

yang bakal menerima skrol masing-masing dapat menjadi modal insan yang bijak dan mempunyai tanggungjawab untuk kemajuan diri, agama, bangsa dan negara.

“Saya juga ingin mengingatkan kepada para graduan agar mengamalkan etika kerja seperti rajin, menepati masa dan sebagainya. Keberadaan graduan

dalam masyarakat adalah satu kekuatan, kerana kebijaksanaan graduan akan membawa kepada kemajuan bangsa dan negara,” katanya. — Bernama